

成安縣志

卷二

671.1443
084
12

成安縣志卷二

地理

古者守土之官皆辨其封內山林川澤丘陵墳衍原隰之名物
隨地而理之以安擾其民陸居也使之佃水居也使之漁山居
也使之樵牧且設險以禦寇盜設市以通有無凡境內關津道
路橋梁舟楫無不以時備具使民各得其用而適其天吾成全
境無山雖有漳河故道從橫十數枝然皆沙蹟纍纍並無涓滴
之水以爲利且地勢平坦無關隘之可言僻在邊鄙名勝古蹟
亦不多見惟大邯汽路自西北而東南直貫中央交通尙稱便
利而邑中無富商大賈資之爲用徒流爲各軍來往孔道使淹

成安縣志
淹垂斃之民增益此無窮之供億也志地理

一山脈

成安全境無山故山脈從闕

二河流

成安自古爲漳河流域百四十年前河南徙境內惟有乾河十數道所遺沙蹟纍纍若聯珠貫串春秋風起彌天盪日掃殺鄰近禾苗而溯其來源要皆漳水階之厲也今擇錄舊志以明源委補續沙蹟以見真象

漳水上流本清濁兩支按清漳有東西二源東源出山西樂平縣大黽谷東南流逕和順縣石猴嶺東西源乃古轅水出和順

縣西南八賦嶺明統志所謂西漳也濁漳源出山西長子縣西

五十里四星池

在發鳩山南麓

亦曰靈湫清濁二漳自山西會衆流至河

南林縣北境交漳口

即涉縣東南之田家嘴

合而爲一東流穿太行山五十

里至磁州界吳家河東過斥邱縣東北經列人曲周鉅鹿堂陽扶柳信都博縣阜城昌亭與滹沱河會達樂成陵縣別出北過

成平章武平舒南入于海此漳流故道也然河伯震怒衝決不

常遷變叵測始由鄭家莊北李重村南呂彪東郭坊西吳家疇

東漳河西野庄西鄉義東路固東東河東小堤東入肥鄉境明

成化弘治間其餘派陽寺北陽連送等溝歲渰沒城郭鄉村爲

縣大患至正德間其河始入魏境成安惟故道存焉至萬歷十

六年水復北徙入本縣境隄外辛寨宋村南寶公等村或被其害尙未衝決堤防也二十三年由堤東呂彪故道甘羅吳家疇東河小堤等村入肥鄉境亦未冲決隄防也至二十八年決王林堤由金山陽寺西馬頭化兒店堤西等村入肥鄉境三十年決寶公堤由辛義霍村南魚口說法臺城南郭分流東一支由東郭轉小東門北道東堡王固村入肥鄉境西一支由西關范兒莊曲村姚家堡西南莊等入肥鄉境四十一年連送楊寺等村夜半河決居民臥不及防老稚沉壓壯者漂流衝人墳墓暴人白骨呼號泣哭之聲竟日不絕水薄城下翻浪如雷相隔僅一雉堞閉門防護僅免於溺至十月兩支始涸大河由徐村連

送彭留北潭姚家堡入肥鄉境崇禎十四年秋由連送口至城
下抵南堤而東由水門浸入城學宮水深丈許逾年始涸清順
治九年由連送徙南魚口北魚口經說法台抵南門而東至馬
頭堤小堤西沙窩村龐村呂村閭村店小堤等村入肥鄉境十
年冬十二月稍徙而南去城里許十一年夏霖雨連旬水大發
遶城小東門內地湧泉未及塞圓照寺後城崩十餘丈洶湧入
城震蕩聲聞數里公私廬舍漂沒殆盡倉庫版籍盡失惟十字
街地高數家未被患民多就之或棲城頭至冬始營居室康熙
元年八月雨五晝夜水大漲數日不落沉舟傷人數十由馬頭
堤徙道東堡大堤西人肥鄉是後無歲不渰無歲不淤城外愈

高城內愈下矣七年七月自說法台衝南郭潰兩堤由南門入城男婦傷五十餘人決城西北隅而出十年八月十一年六月各大水較往年入城者高數尺王公設法防堵捐俸僱役出飲食躬行犒給六晝夜弗懈水乃退城郭以全

按漳水爲患至前萬歷四十一年而甚然猶未入城也順治十一年康熙七年入城者二矣此雖天災流行然亦先事苟且臨事恇恇捍禦失宜之所致也自康熙八年秋王侯公楮來蒞茲土始峻其堤防捐俸僱工倡先士民及時正築內外堤視其舊高厚不啻十倍於是十年八月時其水勢較前兩次幾高四尺餘分爲兩支夾城而流繞城之陽自西南而東

北者尤爲洶悍勢急流壅從外堤盡處直灌東城內堤下怒號湍呼勢如沸鼎內堤幾潰侯乃亟詢洩水處亟撤民居以殺其怒於是自修羊豕祭告潭神力率人衆隨其衝刷立椿下埽又多儲土具又分汎編號又時時出酒肉慰勞鼓勵又多設油箍火把于霖雨泥淖中不時巡察如是者六晝夜乃漸底定城郭竟以無恙富內堤幾潰時人衆錯愕幾欲各顧其私非侯處置有方鮮不爲前兩次之續矣而十一年六月二十二日之水併獲底績則以十年八月一切杜禦具有成規爲奉行之惟謹也今邑民乃益知禦水有道數歲修築彌樂趨事矣

邑侯王公楷作漳水紀異其詞曰大易之言曰天之所助者順也人之所助者信也乃知悍大患禦大災非得天人之助不爲功其所以致天人之助者非順與信不爲功昔宋景公有愛民之言而癸惑退舍越旬踐有投醪之飲而士願前驅其明驗矣余不敏不能追蹤古人但以漳水一事觀之而知人有一念之順于天即災禔示儆之天不難爲轉禍成福之天而况乎天心之原多仁愛耶人有一念之信于人即梗頑掉臂之人不難爲同乎舟共濟之人而况乎人心之原多協和耶是在績誠格神躬先率衆不靳惜小費坐失事幾以自外於天人之助而已漳河自豫之安陽界黍窖谷交漳口清濁二水并流東下而成安獨當其衝每爲民害遠不具述順治十一年由西門入城康熙七年由南門入城皆漂廨庫民居殆盡詢之土人或云隄岸不固或云城門未塞而不盡然也無事則飭隄防修故事有事則甘退縮失機宜比其敗也則諉之于天雖曰天災豈非人事哉余于康熙八年八月二十日來尹是邑自揣涼德菲才度不能消患於未然救災于已至亦付之無可如何已耳然竊計之防水之方築隄爲上次年春捐俸僱工併勸紳士商民輸工修築內外粗備然培塿蟻垤不可遽恃今年春躬率夫役于其低小者高而大之薄脆者厚且監之較前不啻十倍隄之外復爲外隄自西南而東南約五六里所以障蔽于外不使水浸內隄與城垣近此未雨綢繆之計或未免曲突徙薪之譏也居無何八月初一日寅時有聲自西南來雷吼山奔則漳水陡漲矣瞬息之間波浪翻溢經說法直台薄城隅分爲兩派夾城而流一自西南而西北遶城之陰一自西南而東北遶城之陽勢急流壅從外堤盡處直灌東城堤下怒號湍激勢如沸鼎浸內堤幾潰官民相顧錯愕余亟問洩水處僉曰舊由東門堤外自南而北今爲民居矣余亟命撤毀居民大有難色余諭之曰今茲之事一城性命所關較爾茅屋數椽孰輕孰重况水勢衝突爾居能獨存乎姑撤之水退再事經營不猶愈於隨波而烏有耶于是墻毀而水北流始知水聚既久未即北流之先已轉而南決小堤而西悔撤此墻之不早也猶幸差分水勢不甚洶

湧雖潰小堤不至決內堤而逼近南門者毀垣開渠之力也南門外歷久經土塞茲復壅土門內以實之至於內堤初築率皆新土不無罅隙難敵巨浪先此夫役倉皇苦無紀律招號不時難以策應及稍稍整暇乃具羊豕香醴祭告漳河之神點撥胥隸分領夫役三百餘名派定汎地編爲隊伍照汎防守其楸鋤斧杵筐籬乾土各色禦水之物備具時霽霖如注舉步輒躓余冒雨行泥淖中具肉酒唱名遍餉夫役以鼓勵之又置油鑪火把雖昏雨中照耀如白晝自是日晡時直達次日旦罔敢懈遇有衝刷即行杜塞而水勢亦漸定矣然而城東之水衝刷內堤特甚初二日早急督夫役立樁下埽捲蓆抱土築之自北而南約長十餘丈一日而畢堤因無恙然積水難消城外之廬舍未可保也初三日早於東北諸路因勢利導斬蒿疏渠使之北注而入于河雖積重之勢難以遽洩然分其派者緩其力引其支者淺其匯即有暴水橫來而堤可恃無恐矣他如西北汗漫之流亦固厥堤岸防其衝刷不敢以勢緩也而顧彼忘此又於初四日將東南引水入壑處築堤以防洩至如是者六晝夜相繼度勢與水爭衝眞如拒敵之兵不遺餘力幸賴學捕同心士民効力又得紳矜商民等捐錢犒衆余乃得督率親丁各役拮据其間有以克有濟是役也水頭較曩年兩次尙高四尺許而洶湧澎湃抑又過之其內堤之不决者得外堤爲之障而杜其來也城門之不入者以得內堤爲之護而防其衝也東西各要害處之不至潰裂而莫可堤防者由往來看視奔救捕塞之盡得其宜也孰謂人事之不可以挽天災也成規具在遵而行之設有非常之汜溢自有備而無患矣雖然操畚鍤運板楯杜塞疏排與衝洪流角勝負者人之力也而陽侯不驕蛇龍既遠城郭得以保全官民不至胥溺如曩年兩次之受害者又非人之力而天之佑也余則何敢貪天功哉夫亦惟是不敢靳惜小費坐失事機以自外于天人之助也云爾因紀其事以告來

茲舉其要使後之倣念漳水者得以覽焉

又按漳水之溢也率由門入城南門當其衝前令塞之王邑侯公楷視其弗便也撤其塞同東西兩門皆出金市大木爲闌板砌磚兩扉旁爲闌道每遇水至則上板築土因勢增加水退撤去俾門者司之又防水一法也

縣境南鄰鄴故與漳爲近元明以來數汎溢爲害遷徙不一康熙八年王侯公楷增修堤防恃以爲固不爲大害

康熙四十三年以後河漸定復徙而南

康熙六十一年自臨漳羊羔村入縣境李重村

雍正五年自臨漳油房村入縣境東南抹疇至范疇東下趙家

三村分二支一由魏縣南一由魏縣北均至館陶入衛

乾隆五年大水盡趨南支北支遂涸其趨而南者當元城之上

流慮衝決爲城郭患當議於趙家三村築壩挑引使歸北支故

道

郡人王今遠有開漳河故道議其詞曰天下利害之故有出於人事之外者總前後而稔籌之而其說乃立於無可易因物之性順土之宜謀於其始而慎而勞庶不虛規於其利而多

而終乃無悔此非可以不習之情形泥一成之意見也按水經漳水之源有二其一曰清漳出山西沽縣之大阻谷一曰濁漳出山西長子縣之鹿谷山派分流合入河南武安黍窟谷而爲一水

性滯悍迅急挾沙石沮洳以俱下當其衝者高岸爲谷深谷爲陵蓋自鄴以北土疏而地衍無山險巖阻以束其勢無川窪澤匯以蕩其威泛濫浸淫惟其所向故中間若臨漳列人斥邱數被沉

災披圖可索也比年以來全漳入衛下流有歸始無橫礙之虞而廣大二屬尙不免小有遷徙如成安以數里之塞而魏縣遂改北而之南則故道開濬之說誠不可不急爲講明夫魏邑以孤城

逼水隘城之背則大河而其面則支派也每當春夏泛溢雨水分注水落之後則南河復涸而以北河爲經流今忽併匯而南無隄岸以固之無溝渠以洩之隄山沙鬣之壤將不免澤國之憂於

是勞數里人工復數年故道計之得宜宜無踰此者雖然此正不可以無慮蓋凡爲開濬之談者謂故道不遠祗以上流梗厄取而濬之自復其常耳顧未識所云故道者其覃懷底績之舊與抑

水勢靡定漸移漸嚙於此稍久因而日之者與考漳水自西門豹史起韋景駿後歷唐宋以來享其利者數世非怒之於古殺也其時逼附黃河有巨瀆以畜之故獲所注而不遺耳迨至黃水南

徙而平千天雄二郡遂爲衡漳之窟宅歷考郡乘所謂古漳河者更僕數不盡大抵今歲南決明年北移今曲周廣平肥鄉諸處村里民居淤填及半檐額柱棋有僅僅可見者當其漫溢蓋懸釜

地理 卷二 六 天津文竹齋印

而炊爨木而巢幸而陽侯退舍而一石水已餘五斗泥嚮者通流順適之地渺不可問矣當是時豈無故道可挽而相視莫救則勢不可也水之性地之宜實有出於人事之外不得不總前後而稔籌之也且夫計水之利害者當因其勢而順導之況漳之爲水又非可與凡水並論今日之故道即往日之新河徙以下流稍通是以無疇昔之害如今挽而逆之水之所趨漳之使歸水之所舍強之以入挑濬之後保不復淤滯乎淤滯之後可不再挑濬乎去則煩畚鍤之功來復成平陸之地數數然伺水之間而奪之流而卒不勝也不幾於勞而罔績乎且何不用之全漳入衛之先不用之曲周廣平肥鄉之舊也則人事之無權昔之人故知之也然則其在於今計惟有疏而瀹之耳水之所欲即以予之而爲之寬其地利其淤使之暢流就下而已矣昔江夏陳鑿之議固已及此此則事之可行者倘必曰故道之尋漳之爲漳其能屈曲以從人哉夫瓠子之塞河復舊道然當其時特決而出耳而故道未嘗壅也宋時六塔之議斤斤故道而迄無成功黃水關天下之大計而不能舉天下之力以回之也

水至壩衝不成而罷

乾隆二十八年河南南臨漳縣之沙莊建築草壩一座計長二百四十丈頂寬四丈底寬十丈均高一丈每年請領歲修

乾隆四十四年五月間漳河漫溢改流自臨漳縣南高林城決

口下注沙莊壩北前督憲楊勘明壩歸段用奏准停修

乾隆六十年六月間河水漲發自臨漳縣三台改流歸入衛河並流境內俱係無水乾河

漳河南徙縣境無水患矣但地畝屢被浸沒之後畛域混淆興訟者多嘉慶三年邑侯孫培曾來任凡因地畝呈控者悉以庫存官弓丈之各無異詞而健訟者謂官弓用久摩短不足爲憑

侯仿照官弓以鐵鑄之并按其尺寸刻石記焉

邑侯孫培曾丈田官弓記其詞曰成安舊有漳

河每遇夏秋水漲浸淹地畝非冲即淤以致地界混淆民間興訟者多予於嘉慶三年到任凡有地土詞訟即飭房差按照兩造四鄰印契用官弓丈量數年來凡丈田不下千餘頃未有以官弓

爲不足憑者詎有生員楊日隆與貢生黃超選因地畝構訟謂鄉間量地尺丈長短不齊援引丈田碑弓呈請批示遵行繼又謂地主印契與魚鱗冊不符以乞驗鱗冊等情呈請查勘該生所見

誤矣本縣所用官弓係歷任交代存庫之弓該生所稱丈田碑弓乃前明萬歷年間所遺清朝定鼎制度維新一切章程自有因革損益而欲以前代之官弓丈今日之疆域生今反古何可爲訓

且細閱碑文未言酌定官弓即碑旁所載尺寸與存庫之官弓較大本縣以官弓丈田尚多不足若盡用碑弓則畝數之不足更多空糧必所不甘正供又不可闕嘖嘖多事伊于胡底再查魚鱗

冊係雍正十年前任李公所定漳河至乾隆六十年始徙臨漳中間數十年地畝屢被水浸道路溝崖尙不能尋其舊址而地形安能今昔相符况魚鱗冊地段果用丈田碑所載之弓而丈之與抑各用其鄉俗常用之弓而丈之與是皆未可知也故鱗冊非謂盡不可憑而必謂盡屬可憑刻舟求劍見已執矣本縣謂丈田碑非時王之制聊置之無徵不信之列而更按照存庫官弓以鐵鑄之刻石立記鐫其尺寸於左永爲定式嗣後民間賣買田土或其鄉風有常用之弓各從其便如呈控者概以官弓丈量以免紛紛滋擾

至魚鱗冊姑存之以備參考可耳是爲記

沙蹟

第一區區域內沙蹟

第一段沙蹟位置占縣城西南說法臺前距城約二里該沙蹟西北至高家莊史家莊西南至北魚口南魚口東南距北陽村二里許南北長約五里東西寬約二里面積截長補短約十方

里

第二段沙蹟位置占縣城東北距城約三里該沙蹟南至西馬頭堤東北至小堤西西北至道東堡南北長約六里東西寬約二里面積約十二方里

第三段沙蹟位置占縣城東南距城約八里該沙蹟來自西南第四區所轄辛義大霍村小高陵阜等村西南至屯裡村西北至南陽村東北至郭金山方金山南北長約三里東西寬約二里面積約六方里

第四段沙蹟位置占縣城西北距城約九里該沙蹟北來自肥鄉境西南至西姚堡正西距北漳堡約四里南北長約三里東西寬約里許面積約三方里

第五段沙蹟位置占縣城西距城約十二里該沙蹟在王彭留村東南北長約二里東西寬約里許面積約二方里

第二區區域內沙蹟

本區沙蹟東西幹線西自漳邊村西南起東行入廣平縣境該沙蹟占本區所轄下河疇北甘羅漳河店東辛集西野莊東野莊西艾束及南散胡沙河村大寨村丁家莊南鄉義中艾束東艾束等村東西長約二十五里南北寬約三里其中寬窄不一面積約七十五方里本區沙蹟南北支線北來自第五區轄境南行與漳河店東西大沙相連合南北長約六里東西寬約二里面積約

十二方里

第三區區域內沙蹟

本區沙蹟西來自河南臨漳縣境東入大名縣境該沙蹟占本區所轄常重村程重村李重村李家疃白范疃黃范疃與第二區轄村東范疃及鄭家莊抹疃蔡家莊趙三村等村東西綿互約二十里南北寬約二里面積約四十方里

第四區區域內沙蹟

本區沙蹟占本區東部該沙蹟西南至辛義村西北至大霍村東南至小高陵阜東北入第一區轄境東西長約六里南北寬約里許面積約六方里

第五區區域內沙蹟

第一段沙蹟占本區東部南來自第二區轄境西北至牛鄉義北鄉義東北至南渚李莊東河東南至東鄉義南北長約八里東西寬約里許面積約八方里

第二段沙蹟占本區西北部東北來自肥鄉縣境西南入第一區轄境該沙蹟東至西野莊東北至大堤西柴要西北至河疇北劉莊固子南北長約九里東西寬約里許面積約九方里

三交通

道路

成安地屬平原道路交錯攸往咸宜南北雖無著名孔道東西則有大邯汽路貫穿境內交通頗稱便利且壤地褊小與鄰封

接距均不甚遠茲列表於後藉知各鄰封所在之方向云

北		南		西		東	
鄉	肥	漳	臨	縣	磁	平	廣
縣治三十五里	縣界二十里	縣治二十五里	縣界二十里	縣治六十里	縣界二十里	縣治四十五里	縣界三十五里

表 到 八

北	西	北	東	南	西	南	東
磁縣	邯鄲	肥鄉		臨漳		大名	廣平
縣界	縣界	縣界		縣界		縣界	縣界
十五里	十五里	十八里		二十五里		三十六里	三十二里

汽路之由來 民國九年河北大祲而冀南尤甚華洋義賑會
提倡建築大邯汽路以工代賑救濟此方人民十年春間動工
發蠶豆小米玉蜀黍等藉代工資人民恃此生活無算不期月

而全路告成

時高陽孫禹行氏方鎮大名復抽汽車公司
紅利三分之一沿汽路添設小學二十處

郵政

自清光緒三十年由南街陳德成開代辦所是爲成安郵政發
軼之始三十二年改後街王以忠繼之三十二年復改東關趙
鈺繼之至民國二年四月間改歸官辦爲三等郵局局長爲辛
殿元 大名人承差趙鈺任之

成邑之有電話創於民國八年孫禹行鎮守大名時設總局於縣政府警察所保衛團均有支線其始東通大名西通邯鄲後復通永年肥鄉廣平磁縣四縣至民國十一年縣境警察分所亦繼續設立東區有漳河店沙河村南區有李家疃鄭家莊趙三村西區有辛寨北區有店上堡路固村支線四達頗稱便利民國十四年保衛團大加擴充又設分團數處計東區有南鄉義南區有栢寺營郭三村西區有北豆公亦村中郎堡北區有河疃大堤西北渚村共分十支團均設有支線四通八達一有匪警瞬息普傳警團聯結四圍兜剿不獨我邑治安得有保障卽廣平肥鄉邯鄲三縣沿邊一帶亦幸屏藩有賴可稱一時之

盛至民國十五年奉直再戰大軍壓境誅求無厭供應浩繁民間十室九空苛捐雜稅又紛至沓來以彈丸黑子之縣計月餘間征欸三十萬餘遂激起十六年民變慘劇各項政治因而停頓各種建設隨之破壞各處電線電話亦同時燬盡推究其源縣內當局要人豈得辭其咎哉屆十八年雖漸恢復僅縣政府有之各區添置尙不知在何年月也

四關隘

成安境內無險可守故無關隘向以鄭家莊邢村北漳堡店上集警團駐所爲關隘然亦名不符實今不錄錄其有寨堡者權

補關隘之缺

咸同間髮匪初平捻匪與山東土賊張錫珠等復起時率羽黨擾亂縣境村民意圖自衛自同治元年後六七年間四鄉相繼築寨八處茲將築寨各村列後

一 漳河店 同治二年築起在縣東二十里

二 北漳堡 同治六年築起在縣西北十二里

三 北郎堡 同治七年築起在縣西十二里

四 沙河村 同治七年築起在縣東十里

五 河疇村 同治七年築起在縣東北十二里

六 北徐村 同治八年築起在縣西南二十里

七 李重村 同治八年築起在縣東南二十里

八東鄉義 同治八年築起在縣東北二十里

集鎮 津梁 堤堰附

五名勝

鳳凰臺在縣北五里舊志有鳳凰集其上名勝志明萬曆三十二年

知縣劉永脈重築畿輔通志

清雍正十一年知縣趙元祚再築光緒七年紳民捐募重修縣冊

唐呂岩西江月題鳳凰臺詩月落烏啼人靜風吹滿面松花道人邀我煮新茶蕩滌胸中滯灑世事不堪回首夢魂猶繞天涯鳳凰臺畔即吾家管甚明朝今夜明劉永脈重築鳳凰臺記成安縣城北五里許有鳳凰臺父老相傳唐開元七年純陽呂仙師西適邯鄲曾憩息於此自題西江月詞一首而去迨今千有餘年文士墨卿騷人遊客登其臺頌其詞飄飄然輒起雲霞之思焉萬歷辛丑余來牧茲土披閱舊章每欲登眺其地以狎玩仙蹤將彷彿乎靈鳥之鳴聞雖嗜而洋洋自得也第風塵奔走簿書拮据三載因循未得一償夙願適纂修邑乘博采今昔始攬轡蹤跡之至則臺已傾圮僅餘一小邱高不盈尺鞠為茂草因躊躇慨歎者久之及今不一修葺恐日浸月削則千載靈臺或不免同廢圃頽垣共消歇於荒煙野露風塵雨夕之餘非所以存古也遂督

密渺居民各具筐篋借力以崇斯臺仍將仙筆題詞併邑人屬和者勒置左方以志景慕山一簣而十仞惟後賢是望 吳維東詩青蛇飛吟黃鶴舞煙霞客坐江湖主江邊湖上兩高樓濡殺秦皇與漢武斥邱城北古土堆何人喚作鳳凰臺何緣也枉回翁駕應向邯鄲道上來落月烏啼似昔時新茶誰煮復邀誰蓬萊多少神仙家問取通眉長爪兒

廣平府志參舊縣志
名勝志畿輔通志

匡教寺在縣南二里許曹溪二祖慧可說法處隋開皇初築臺

明代相繼重修清嘉慶元年知縣薛鑑重新說法臺光緒三年

知縣蘇殿華十九年知縣戚朝卿修葺

明袁魁記略邑西南一里許有臺相傳隋開皇間僧慧可說法於茲

有墜花湧蓮之異閻羅亦臨焉世遠獨遺一荒邱至我明嘉靖己未兵憲陳公過之謂崇其臺可興氣運倡議修築臺高二丈餘四面包以磚石臺上建閣閣中塑佛像千餘東西建伽藍二殿臺北建前後二佛殿臺前建閻羅殿南向山門西向歷數載而工落成亦云備矣至萬歷壬寅秋廩延劉侯至覽斯覽古蹟歎曰異哉佛居臺下位置未免失宜困購地拓而大之臺上易以二祖像下東西建閻羅殿各五楹宛爾聽受者前建始祖殿三楹以示衣鉢之源移伽藍殿於前之左右各一楹南建山門三楹東西復設便門以通往來二佛殿亦稍加補葺焉斯工也制度咸由禮定規模悉以義裁井井翼翼壯麗宏敞歸然一勝慨哉緣余亦共僉謀者遂屬余記 李齊芳記畧成邑西南距城三里許舊有臺址父老相傳曰慧可說法臺與國朝一統志所謂達摩慧可說

法於茲者不無大同小異考諸語錄所記但曰慧可既受達摩衣偈乃遊鄴之成安說法於匡教寺茲臺所由築也於是辯和興謗償債派流之說事時在開皇十三年時達摩終於禹門已久當以父老相所傳爲信歷唐宋金元垂八百年於茲矣漳水泛溢日就傾圮嘉靖乙未邑侯麻城劉公演過而歎曰斯古蹟也可坐視廢哉乃相與謀築時副憲陳公見吾稱博物且明堪輿理適以巡歷之暇尋求往迹劉公以是告且往觀曰火居離位崇是則邑之才其有興乎於是邑士大夫力倡修崇而沙門又皆以其說鼓之鄉民踴躍施地輸財有差遠邇聞風趨役者無慮數千人不旬月臺崇若干丈廣若干丈前爲門三楹後爲殿三楹殆浸浸乎告成矣值庚申歲饑役爲暫輟越明年辛酉邑庠士領鄉薦者四又明年壬戌貢士登甲第者三始信陳公之說爲不誣云古邠劉公希尹適以是歲牧吾邑謂政先人才而臺之興廢則才之盛衰也益鼓舞趨事爲閣於臺上高若干尺崇檐峻宇金碧交輝巍然邑南一偉觀矣翼以二廊比以方丈繚以周垣癸亥秋月落成屬余爲記云清溪續記略吾邑城西南里許舊有二祖神光說法臺即古之匡教寺也創於隋盛於唐迄宋元明代有增損邑乘載之甚詳至清聖祖中年屢遭漳水之患墻垣臺閣盡隨河伯而逝祇餘後樓三間歷年風雨摧殘僅存屋壁甲寅歲河東范別駕來攝茲篆首倡捐修而閻閻男婦歡騰四野包十築臺不日崇高幾盈畝計矣嗣後關中薛邑侯建樓江西譚邑侯建殿歲戊午山左孫邑侯來守是邦復捐俸增修庀材鳩工大擴其至於後樓塑如來佛三尊樓上塑玉皇二角樓乃登樓之證級兩廂各建三楹塑菩薩像又於前殿塑佛一周列羅漢十八後厦一楹則韋駝也東西並建三楹東塑二祖佛西爲遊宴所前建山門三門兩旁塑金剛四像鐘鼓樓各一楹門之東臺高一丈有餘廣一丈有餘北建亭一座週圍牆垣廓然大備光緒九年春山左白邑侯躬膺簡命撫莅茲土政簡而和鳴琴而治邑之士庶挽捕廳况公以無田養住持爲請遂慨然捐地十五畝藉非我侯留心地方俯從人願安能保無風雨飄飄樵牧踐履之患也哉明

白南金詩僧自何年去臺因說法存憑虛思往事弔古問空門草暗傳衣地煙銷乞食村不知龍
聽杏花兩尙翻盆阮吉詩梵宇傍林阿層臺倚檐際不見雨花人空餘布金地輝輝彗月明冉
冉法雲霽光寒逸思生塵遠境偏異暇日對禪僧虛名愧匏繫張懋猷詩水荒城郭浮郭盡見
孤閣獨往暮天浮且用謝維逌此臺凡幾廢徇名費周帀簷低檻又逼俯視厭昏黯所忝人天境
殊不得開圖嗟哉此泥途秋風日蕭颯蔡可教詩何年有此說經臺人道傳經佛子來認得吾
生纔舞象但見一邱斗大沒蒿萊倦遊宦海歸來後忽見深林梵宇開梵宇之南突高閣西山直
與同崔嵬年來漳水繞城郭一鸞如帶山門迴龍潛蛟舞那可測爲雨爲雲徧九垓吾邑大夫中
土彥登高攜我擔樽疊憑欄一笑弔千古相嘲佛子胡癡哉萬方聲響已成癖金鐸當年空震雷
君不見千手有遺指千目有遺眎指視愈多人愈惑何如面壁遠塵埃塵埃本自靈臺起屏息忘
言作聖胎雨花不動諸天淨隱隱神光接上臺吳維東詩翟官人何須怒姬和尚償汝負刀頭
左臂雪中身四大非真久已悟花縣甘棠翦即休說法臺邊漳水流臺西北水西潑荒村古塔名
二祖王孫昌詩謫仙爲政澹無營坐對水絃鶴不驚有時染翰烏皮几有時中聖竹葉清乾坤
節序屬重九選勝登高向林藪城南傑閣眞凌雲天門咫尺謫星斗磴道如經五丁開捫蘿踟躕
陟良久憑欄眞個小人寔何須天柱峯頭走近水迎眸白練橫遠山閣筆丹青手砧杵薄空和雁
鳴霹靂西風木葉吼齊梁燕趙結比鄰茱萸掩映如灑酒爲問當年說法人滄溟幾度變田畝立
雪斷臂事有無一花五葉仍開否今人徙倚古人臺古人豈料今人來今古分明傀儡場石火電
光轉盼哉君不見龍山落帽孟參軍落帽風流天下聞了不容思詩滿箋才有高名垂典墳又不
見昔日籃田崔氏莊短髮白幘任疏狂全憑性癖驚人句迄今騰騰琬琰光富貴功名見現水賴
有作者氣馮凌賢侯結撰自不朽學步邯鄲慚不勝曹溪此日留高蹟千載還知我輩登大道
本無言法從何處說築臺非祖心獨立少林雪

清風觀在邑城東南隅隔堤有高地一區古漳神廟在焉前邑侯高公景祺資其地鑿井種樹標爲農事試驗場者也惜不久廟遂傾圮近邑紳趙召南王紹平諸人以保存古蹟之心懷恢復名勝之志釀金修葺以關聖呂祖與漳神合祀一堂名之曰清風觀雖規模隘小不能與平津各大公園併衡然每當城關集會期間亦士女遨遊之佳境也

採訪

小輞川在南門外道西舊爲陳氏廢園王瀛洲先生購而葺之植屋三楹建橋一孔榜其門曰小輞川時邀邑令及同城官佐暨邑之晉紳先生契游於此茶餘談道酒後吟詩教諭舒壽祺

有夏屋窗三面春城水半腰之句今當春二三月新蔬乍長梨花盛開猶令人流連不置焉

六古蹟

衡漳故道在漳河集等村卽大禹治水所至處

舊縣志

斥邱故城

在縣東南本春秋時晉乾侯邑左傳昭公二十八年公如晉次於乾侯杜預注乾侯在魏郡斥邱縣漢高帝五年封功臣唐勵爲斥邱侯後爲縣應劭曰有斥邱在其西南闕駟云地多斥鹵故曰斥邱高齊改置成安縣而故城遂廢元和志成安西南至相州一百五十里斥邱故城在縣南三十里

廣平府志參
大清一統志

按寰宇記斥邱故城在成安縣東南三十里方向與元和志

微差里數正合方輿紀要乃作十三里考地理志韻編成安縣自齊改置卽在今理顧祖禹當是誤三十爲十三耳通志引史記惠景間侯者年表有瓜邱侯劉甯國文帝四年封至孝景三年偃反國除索隱曰斥邱縣在魏郡疑卽此考史記漢書功臣侯表文帝九年斥邱恭侯鼂嗣後元六年侯賢嗣逮武帝元鼎五年侯尊始坐酎金免豈於四年前復分斥邱地名曰瓜邱而以封劉甯國乎恐未足據通志又引山東通志漢斥邱縣在今邱縣北四十里北營集考水經注漳水自平陽城北括地志平陽故城在臨漳縣西又東右逕斥邱縣北卽裴縣故城南又東北逕列人縣故城南又東北過斥漳縣南又東北逕平恩

縣故城西一統志表今邱縣漢平恩縣地據此則邱縣北之北營集與漢斥邱中隔數城不惟非漢斥邱縣治恐亦非漢斥邱縣地矣山東通志失考

按民國十七年春有城內住民樊某在縣治西馬王廟前廢坑中伐土掘深四尺許發現古塚一週可一丈八尺有奇深約五尺棺骨全無僅得磁瓶一大磚二長約尺有半磚上有墨跡數行畧可辨識曰大唐開元二十三年邵公之墓在縣城北三里許十九字旋爲邑侯方公濟川聞訊差取磚瓶查看遂存縣署後方卸任磚與瓶亦隨之去然此與一統志所敘舊城在縣城東南三十里或十三里均不符合或者其間

另有變遷未敢臆斷姑誌之以備參考

乾侯驛在縣治東今廢舊縣志

兔臺在縣南趙敬侯四年魏敗我兔臺正義曰兔臺在河北

史記

成安縣有兔臺

廣平府志參舊縣志
史記大清一統志

寇公廳在縣治宋寇萊公準知成安時與民期會賦役處今忠

愛堂

舊志作忠恕非

是也

畿輔通志

明嘉靖十八年修萬曆三十二年知縣劉

永脉重建

縣志 寇準春日登樓懷歸詩高樓聊引望杳杳一川平野水無人渡孤舟盡日橫荒村生斷靄古寺語流鶯舊業遙清渭沈思忽有驚 又春日書懷詩會

讀前書笑古今恥隨流俗共浮沈終期直到扶元化敢為虛明名役片心默坐野禽啼晝景閉門官柳長春陰世間事了先須退不待霜毛漸滿簪 又春晝偶書詩白晝偶成芳草夢起來幽興

有誰知風簾不動黃鸝語坐看庭花日影移 明樊瀨寇公廳詩當年勳業冠羣僚聲震華夷萬里遙鎖鑰有司驚北使樓臺無地起南朝半生得喪愁多險滿腹忠貞老未消弔古重尋期會所

至今猶見姓名標 廣平府志參舊縣志

畿輔通志

府館在縣治東今廢

廣平府志 參舊縣志

主簿宅在縣署左今廢

廣平府志 參舊縣志

乾侯古驛在縣治東今廢

督撫名藩坊大中丞坊

吳善言

廣平府志 參舊縣志

海岱方嶽坊

王宮用

廣平府志 參舊縣志

進士坊

馬琇 張潤身 廣平府志 參舊縣志

孝子坊

侯驄

廣平府志 參舊縣志

魯昭公廟在縣東北一里

明安謙詩驅車出東城高原聊逞眺鬱鬱見頽墻云是昭公廟陳迹翳蒿萊霜風起寒燒世亂絕綱常日入無

返照當時千乘君幾為匹夫笑感感羈旅魂 廣平府志 參舊縣志 茫茫不可弔千載同一傷感激出中竅

成安君祠在縣治西北祀漢陳餘明嘉靖二十年知縣萬文彩

改建圓照寺東

大清一統志

萬曆二十二年知縣劉永脈重建今廢

劉明

永脈記畧成安君祠不知創自何時歷世因之土人歲時致祀蓋以成安故趙地君為趙將而此實其封爵云君之由封不可詳嘗披史遷列傳君始與張耳為布衣交嘗受笞耳於樹下數語而

悟其規模識趣卓然宏遠矣迨與淮陰對壘井陘廢左車計輒自稱義兵不用詐謀竟以殞身儒者頗為惜之趙地古稱慷慨悲歌之俗曩時豪俠如武靈平原望諸藺相如諸君子今人每一念

至輒有扼腕興慕者況生君之爵邑聞君之梗概有不懷仰者乎則其立祠奉祀永永無斃也固其所矣祠舊坐豫備倉後成化十三年前令何君讓奉郡守秦公檄殫力重新之有江陰吳公啟

記石在焉嘉靖二十年萬令文彩復移置圓照寺東前為門屏中為正祠後為羣房益加壯麗迄今垂六十餘年正祠曾經補葺尚堪奉祀羣房已湮沒無存門屏浸成敗壁全斷碑偃伏草萊中

半生苔蘚更殘缺不可讀矣即宜及時鼎新緣改建文廟暨城隍神祠財力俱誦工未易就姑為新飾門垣重懸匾額復礮石付剗厠氏勒此數語俟懷古君子得有所考而增飾焉是則余追崇

前哲意也 吳維東詩一鵠摩霄羣鳥起關西鹿走關東喜誰從白馬渡黃河大梁名儒陳氏子霸業只消馬箠成男兒肯作鴻毛死怪底奇謀失左車看來頑福輸張耳湯沐千秋俎豆存英風

颯颯來泚水 李齊芳詩豪傑方歸漢孤軍擁趙城論交何按劍報國有捐生故壘長河急荒祠斷碣橫年年伏臘裏老穉已含情查克練詩古柏陰森棟宇幽將軍生氣未全收何當漢帝興龍

日更值韓侯逐鹿秋泚水東流應寫恨陘雲北向亦含愁於今廟貌崇千古莫問當年廣武謀朱禋詩信耳全智勇漢兵精復強專闔數千里其鋒莫能當長驅入井陘萬騎如龍驤賢哉李左

車多算深且長謂言守斯險二將悉可戕奇謀竟弗售坐待泚之陽無何大將出未戰先奔亡空壘遂信兵疾若龍電光既入背水陣彼此相頡頏俄然易漢幟歸騎皆倉皇悲哉成安君身首各

一方千秋過乾侯事往人已亡惟餘昔時廟猶存舊封疆停驂不能去遠樹空蒼蒼 廣平府志
參舊縣志大清一統志

按舊縣志載成安君祠在縣治西北祀典祀趙陳餘期同壇
品物四果三牲邑令劉永脈重立成安君祠記言成安君祠
不知創自何許時歷世因之明成化十三年邑令何君重修
嘉靖二十年邑令萬君復移置圓照寺東又閱六十餘年尤
復重立蓋以成安古趙地君爲趙將而此寔其封爵云又封
建表列成安君陳餘與張耳共立趙王歇後耳降漢歇以餘
爲代王號成安君廣平府志雖存其祠而按語引史記正義
謂漢書地理志潁川郡有成安陳留郡亦有成安餘所封究
於此成安無涉邑人立祠與趙諸王並列封爵指爲謬而失

當且志餘辯證仍引史記正義地理志云成安縣在潁川郡屬豫州並謂漢書項羽傳於陳餘刪去成安君三字斷定今之成安自北齊始置以爲成安君之成安與今之成安無涉之鐵證似矣而猶有未盡焉考秦楚之際賢雋豪猾有功之人有封爲某某君者有死後諡爲某某君者有生前封爲某某侯並賜號爲某某君者有功成名立欲以招來一切竟自號爲某某君者有均是人也而易地易時卽易其號先爲某某君後卽爲某某君在此地爲某某君在彼地卽爲某某君者得名不同總之不失爲別號者近是封爲某某君者如魏安釐王封公子母忌爲信陵君楚考烈王以黃歇爲相封春

申君漢王封侯公爲平國君是死後諡爲某君者如齊田嬰
卒諡爲靖郭君薛公文卒諡爲孟嘗君是封爲某王侯並號
某君者如秦封衛鞅於商十五邑號曰商君高帝封樂淑於
樂鄉號曰華成君是功成名立自號爲某君者如蔡澤謝病
歸相印號爲綱成君項梁自號爲武信君河北賢豪亦號武
臣爲武信君是易地易時卽易其號爲某君者如楚昭王母
宣太后之弟始爲華陽君繼亦號爲新成君燕封樂毅於昌
國號昌國君趙封樂毅於觀津號望諸君是以上均見史記又考唐博
士司馬貞索隱曰諡爲靖郭君者謂死後別號之曰靖郭耳
又曰孟嘗君襲父封薛而號曰孟嘗君云諡非也孟字嘗邑

名在薛之旁宋參軍裴駟集解曰詩云居常與許鄭元曰常
或作嘗在薛之南唐長史張守節正義曰四君封邑檢皆不
獲惟平原有地又非趙境蓋並號諡又曰楚漢春秋上欲封
侯公曰此天下辨士所居傾國故號曰平國君由此觀之某
某君者皆一時別號彰彰明矣且項王封餘環南皮三縣趙
王歇立餘爲代王府志指舊縣志以成安謂爲餘封爵爲失
當是矣惟言潁川陳留之二成安謂餘所封未審孰是則仍
屬膠柱鼓瑟之談陳餘至陳謁陳王陳王僅以爲校尉君之
號當不能遽加及從武臣徇河北下趙數十城立武臣爲趙
王都邯鄲則成安固邯鄲旁之小邑如所謂薛之於嘗也後

擊敗張耳迎趙王歇還信都則成安仍在輦轂之下况餘說
陳王卽自言臣嘗游趙知其豪傑及地形史遷亦謂其好儒
術數游趙苦陘餘之號成安君或以成安爲湯沐邑皆勢之
可行而易至者若餘在趙而遠領陳留潁川不能至之邑權
稱成安君則不特情事所無陳餘賢者亦決不樂爲此也和
意餘之號成安君在武臣王趙以陳餘爲大將軍之時或自
號或武臣號之或趙之豪俊號之文獻雖無徵而成安爲此
之成安陳餘之爲成安君卽在此時可斷言焉故項王封陳
餘卽脫口而出曰成安君以冠之謂其有功於趙亦指餘爲
武臣造趙而言足見當武臣王趙時陳餘已爲成安君無疑

而漢書刪去成安君三字或以趙爲一時僞國餘爲一時僞將不足輕重特爲刪去亦未可知至地名曰乾侯曰成安曰斥邱和意古者三名皆有或一地或如後世有驛鎮參雜其中以待上之採用及漢改縣名曰斥邱則成安二字見而復隱者六百餘年至北齊重復名之耳若謂成安北齊時始置則亦未免盡信書矣明嘉靖間給事中鄆陵陳棐因謫丞長垣檄修郡志於屬縣各作原縣一篇謂六國趙時縣有成安名趙王因以封陳餘爲成安君非先封而邑後名也今以時代及勢情考之益信迄今城北十里有村曰大鼓廟

今名大姑廟相

傳係陳餘當日出兵時擊鼓之地亦可作陳餘在縣爲君之

一證也邑人士從古祠而祭之又何疑哉

仰功祠在縣治西南祀宋成安尹寇準明知縣桂萼舊在縣治

西北嘉靖二十五年知縣萬文彩建萬曆三十一年知縣劉永

脈改建今地

明李三畏弔寇萊公詩曾憶當年恢相業不知此地鬱棠陰我今祠下聊瞻顧愧與先生步後塵 廣平府志 參舊縣志

遺愛祠在城東南祀明知縣章允賢嘉靖十九年建萬曆三十

一年知縣劉永脈重修

明王朝相記畧章侯九華治成安懋著循良民懌以孚當道者嘉之旌章疊疊越兩載僉曰九華子賢最資深矣交章薦

之天子天子曰是作朕股肱耳目者也侯得檄戒期以行行之曰士張祖民臥轍呼曰我侯舍我而去其將焉攸庇哉泣然涕下途之人亦為歔歔既去越月邑賢士大夫長老童子洎諸社隸無

慮數百人詣余請曰我侯九華懷柔我土厥澤維殷今往矣我輩少日以壯壯日以老後我輩而生者或不知有侯亦不知有侯之澤也僉議肖像作祠以彰遺愛惟子記諸石用垂不朽庶我侯

之澤久而弗泯而沃其澤者亦獲以永厥思也余聞而感焉昔宋有寇萊公常治斯邑而澤被於邑之人其竟也躋相位樹奇績景德祥符間天下以其身為安危要亦自其施諸郡邑者而廣大

之也即九華所以繫民思者觀之今昔豈易致哉詩有言豈弟君子民之父母九華所謂其人非耶 廣平府志 參舊縣志

成安縣志
衙神祠在儀門東舊在儀門內東偏明洪武三年知縣彭子潤

建中祀土地神配以漢相國蕭何曹參嘉靖十七年知縣章允

賢修萬歷三十一年知縣劉永脈改建今地清嘉慶五年知縣

孫培曾重修

廣平府志
參舊縣志

旗纛祠在演武場

廣平府志
參舊縣志

圓銘寺在縣西十二里郎堡村唐太極元年建有古柏石佛圖

俱千年遺跡

大清一統志

今僅存舊址

縣册
舊縣志

廣平府志

參大清一統志

霧都寺在縣東北十八里閻村店中有塔唐天保間建明永樂

正德嘉靖間相繼修

畿輔通志

清順治十五年重修

縣志

今塔倒坍僅

存舊址

縣册

明吳維東詩君不見霧觀寺中窳堵波幾番倒影入漳河落成天保十三載
鈴鐸纔懸鞀鼓過榻來郭李與安史忠魂逆骨同銷磨遊人但見天保字爭唱元詞

與白歌蔡可賢評古寺荒原一徑斜寂寥孤塔銷烟霞飛身直上三千尺極目蒼茫十萬家忽覺清風吹鬢髮頓疑塵世隔雲沙登臨不盡虛無盡天上遙聞演梵車

廣平府志 參畿輔通志
舊縣志 唐塔附

廣福寺在縣西十二里夏陽村唐元和十三年建舊志明宏治六

年重修縣志 廣平府志 參舊縣志

文殊寺在縣北十五里河疇村宋熙寧五年建舊志明宏治十六

年重修縣志

按通志及縣册縣北十五里有普賢寺建造重修年月與文

殊寺同當是一寺今廢廣平府志 參舊縣志

洪覺寺在縣西南二十里徐村金大定初建舊志明永樂正德間

重修廣平府志 參舊縣志

圓照寺在縣治西北明洪武十五年建舊志內有古柏一株東廊

為藏經殿寺前有大士居明宏治五年知縣張斂嘉靖十三年

知縣韓聰萬歷三十一年知縣劉永脈各有修葺清康熙十年

知縣王公楷二十八年知縣黨聲震乾隆三十一年知縣熊恩

絨相繼重修縣志光緒十七年邑人王慶潮復修縣册明王家瑞藏經

舊俱無全藏上乘希造頓悟實難不假文字何覓妙因又學徒之所患也城中圓照寺僧會所在

演法敷教當為首倡先是有寺僧圓鎮者動念及此發願取藏以鎮仁宮以資講席於嘉靖辛亥

躬詣金陵請於禮部往返三載全藏儼然臨於境內和尙迺於中途示寂夙志既償缺典亦備可

無憾矣而安置講解尙無處所於是其徒真梅等即寺之東廊創修殿宇翼以旁室齋厨賓館亦

皆足具又歲請高禪聯席檢閱時予先祖寒泉府君及諸檀越儲糧供養亦既有年至萬歷癸巳

則四十餘度春秋矣風日飄燥雨雪沾蝕不無廢圯衆共惜之復有鎮上人齋徒通箱者與其徒

撈渠等齋心募化載加修葺其時歡心爭鼓淨施旁流軒蓋捐金綺羅解珮者紛如也飭材鳩工

揮金命匠頽危者完固欹側者卓舉卑隘者高廠幽闕者光華迺有新造銅佛龕於殿內而慈輝

顯若又有古遺柏樹挺於門右而翠色藹然可謂闢別院於蘭若起精舍於招提誠梵宮之天祿

石渠矣諸上人與諸檀越之功豈可誣哉謹勒於石以垂不朽蔡可教大士居記畧圓照寺之陽

舊有大士居蓋未審創自何時第考曩所遺碑記知重修於我朝之正統七年歷久頽毀後且鞠爲垣途矣承使王之讓邑民張名遠等咸欲修復其迹而沙門勝根等復作之其故址與寺之山門正對縱橫約十三丈有奇於是募緣釀金庀材鳩匠作正殿三楹臂軒如之又於殿之東作禪堂三楹殿之西作僧舍四楹山門北面儼然有師事梵王之意且金丹輪奐龍鳳翬飛較之舊規規模殊爽塏華麗工始於壬辰之春落成於癸巳之夏邑令君每公餘輒小憩於斯大夫士居林泉者時尋幽於斯客從遠方者亦遊覽於斯兩壁間且多騷人題詠裒然爲吾邑一偉觀矣乙巳冬邑侯廩延劉公徵文考蹟蒐輯諸廟祀碑記錄入邑乘中命之讓等斲余一在縣東南記吾恐閭閻細民不察邑侯之意而猥以身徇之於釋也遂濡筆爲之記

二十里郭方堡明洪武間建永樂正統景泰宏治嘉靖萬歷間

相繼重修縣志明白南金詩古渡褰裳至逢僧錫杖還憐而登彼岸偕我度迷關鐵限工書久珠林說法嫺楊枝春正發不許野狐攀廣平府志參舊縣志

永興寺在縣南二十五里鄭家莊廣平府志參舊縣志

福勝寺在縣東南三十里三家村明萬歷間重修今廢廣平府志參舊縣志

觀音寺在縣西南十二里霍村廣平府志參舊縣志

迎祥寺一名迎祥觀在縣治西南金元明各有修建舊志清乾隆

三十六年重修並添建關聖帝君廟於中殿縣志光緒十八年紳

民捐募復修增建後殿三楹觀中舊有古柏二數百年物也今

廢探訪冊明袁魁記畧成之迎祥觀創始莫稽閱碑記歷金元明重修者四矣中有合抱之柏二幹若蟠龍今已無存獨一茂槐蒼然翠蓋旁拱而俯焉若依誠古琳宮也萬歷壬寅秋

廩延劉侯來牧徧禮諸神至觀見三清後殿蕩然頽矣虛皇前殿日就圯焉詢道會司從來未有也乃易民間隙地建祠三楹牆垣備飾署匾曰振起元風擇道士靜明住持命工於後殿大加修

葺前殿亦補飾之增其臺砌新其塑像煥然一奇觀矣予因記之蔡可賢古廣平府志柏詩古柏森森道士家上清宮殿鎖煙霞參天黛色長千尺不羨洪都觀裏花參舊縣志

呂仙祠在城北五里鳳凰臺上明萬歷四十二年知縣李三畏

建縣志明李三畏記畧成安之乾隅舊有鳳凰臺蓋不知其作於何始義於何居惟是臺以鳳名豈其臺之初成也轟轟秀起雲縷霞蒸彼鳳兮鳳兮覽德輝而下之歟說者又謂純陽

呂翁曾過登此臺信宿而去西適邯鄲道中然亦不經見其嘖嘖於田夫野老之口不衰也由今觀之臺峙而鳳集鳳鳴而仙至氣類之感召實有固然矣余視政之甲寅適至其所周圍諦觀僅

見斷碑覆草萊中而臺址而仙迹則邈乎其不可追余嗟悼者久之遂謀諸父老沿其故墟集工役具畚鍤民固不憚征繕以趨厥役也浹旬而臺成顧祠宇未立神將何棲而作臺之意荒矣越

歲之明年春復鳩工聚材而仙宮懋建焉爰塑神像其中几筵如在俾百世而下不有令人猶知臺耶鳳耶仙耶與邑並重而不可泯滅者歟若夫恢宏而光大之姑以俟後之能者茲不嫌於簡

陋蓋作法本意
亦以重民力也

廣平府志
參舊縣志

眞武廟在縣治西北

志

明成化初重修萬歷三十一年知縣劉

永脈增修

縣志明蔡可教記畧我劉令君蒞任之三年也政通人和四郊甯謐迺蒐邑乘中神所應祀者協士論順民情修葺其祀宇焉元帝一祠又令君首崇而深

念者也時有士人唐子若彝及壽官韓遇春咸樂於經紀其事規制湫隘者恢拓之基址頽圯者增築之周垣汚聖者丹碧之撤舊改新屹然具瞻一邑且材不期於速集役不違乎農時而工迺告成矣於時邑君爲之色喜因介唐子問記
廣平府志
參舊縣志

東嶽廟在城東明萬歷十二年建

志

三十三年劉永脈增修

縣志

廣平府志
參舊縣志

三官廟在城東南明萬歷間知縣倪湯劉永脈相繼增修

縣志

廣平府志
參舊縣志

天王廟在北城垣明萬歷四十四年知縣賈三策建

縣志

廣平府志

參紀事
縣志紀事

碧霞元君廟一在縣治西北

王元鑣記畧治西北泰山祠肇宣德訖萬歷葺而新之者四桑梓先民未必無灼見也歲甲申受漳醫盡

餘址矣論者曰祠之淫神弗安也姑假手我河伯耳不則長五嶽者隸四瀆矣如線之漳敢與競尺寸土耶審其然是泰山之神甲申以前夢夢甲申以後乃醒也既醒矣似當牖此蚩蚩者使咸知神意原無樂乎人之棟宇我頌禱我也胡以祠湮不旋踵而李從山輩遽起而經其事翻若有牖之者然記云有功德於民則祀之泰山之雲觸石而生膚寸而合不崇朝而雨天下可以被其澤即天下可以昭其報吾邑汲汲於祠亦云報耳何異焉殿左右計楹十有八六祀龍神為漳患也十二祀閻羅王八浮屠地獄說怖死也別三楹特巨麗則重門焉門之東西平其樓中央竦其坊餘材碎構不中程式者畧之矣試一寓目丹楹疊霄金鏞射日土木輪奐極巧窮能是豈彈丸黑子鄉所宜有者哉自順治元年甲申逮康熙七年戊申積二十餘年工乃就乃以悟曩祠之災於水非嶽靈瀆屈也欲啓其新不得不捐其舊也設從此果安瀾終古風雨以時幹之止既甯札厲不作神茁人方不翅萬間長廈區區匠石畚鍤塗墍丹雘之勞詎塞祝萬一乎異日者就使秩宗執祀典而議焉

邑父老其有辭以對

一在縣西西魏村一在縣東南呂彪村

廣平府志
參舊縣志

蚩尤冢在成安縣界

太平寰宇記

今沒於漳

縣志

按通鑑輯覽黃帝誅蚩尤於涿鹿之野今宣化府保安州地

冢不應在此

漢趙王張耳墓在縣東北三十里北珠村東沒於漳誌石尙存

字剝蝕不盡辨廣平府志參畿輔通志舊縣志

宋禮部侍郎王明墓在縣東南一里廣平府志參畿輔通志舊縣志

龍圖閣直學士王廣淵墓在縣東南一里廣平府志參畿輔通志舊縣志

明都御史史鑑墓在縣東北三十里廣平府志參舊縣志

杭州府同知李果墓在縣南三里廣平府志參舊縣志

平陽府知府張潤身墓在縣南二里明李維禎銘曰維爾長才維爾高時兄難為弟父不得子位居弟次一間而已

十有五年亦孫父齒以仲仲氏為伯伯氏爾弟爾父於爾乎死爾沒牖下叔不及視我思先民或不逮爾或爾相類是亦衆矣以爾血食予不必己以爾有聞其文則史漳水之濱夏陽之里魂歸

來兮聚 廣平府志 族於此 參舊縣志

太僕寺卿王宮用墓在縣東南三里

明褚鐵銘曰吁嗟王公畿輔之英三為守令清惠有聲藩臬屢更勲勞炳耀履

正奉公恥阿權要二十八載始憚僕卿三月致政高節完名爰及夫人勤儉孝友惟德之行於今罕有恩褒三代存沒允光我銘諸石百世流芳

案明王世貞適晉紀行有潞安王守宮用來謁則宮用曾官

潞安守矣

廣平府志
參舊縣志

戶部主事安謙墓在縣東南三里

廣平府志
參舊縣志

山東參政蔡可賢墓在縣東南三里

明申時行銘曰剗犀之鐸不以鐵鉛函牛之鼎不以烹鮮宏畧璋材而俾屯遭

持斧握籌出入戈鋌馴暴鋤凶有聲翰旋起旋仆卒以永捐公豈星精其神麗天鑄石闕詞以甯其阡

廣平府志
參舊縣志

僉都御史吳善言墓在縣東十五里

明郭思極銘曰於維吳公為國撫臣堅持冰蘖夙夜維寅不吐不茹允文允武

詰兵覈餉幹國之盤誰為厲階訛言啓釁直道猶存捫心無恨姑蘇治平卓冠守內帝曰嘉哉風我有位赫赫勳名穰穰福祉壽考令終繁多男子赤邱之阜鏗彩埋光公神攸慰百世其昌

廣平府志
參舊縣志

開封府推官王來召墓在縣西南一里

廣平府志
參舊縣志

陽曲縣知縣袁魁墓在縣西南一里

廣平府志
參舊縣志

布政使李杜墓在縣東北霧觀寺西

廣平府志
畿輔通志

陝西副使吳維東墓在縣東十五里

廣平府志
參舊縣志

臨洮府同知冀宏道墓在縣西一里

明陳廷謨銘曰雄文蔚然偉伐巍然皎皎素節更玉潔冰寒凡擅長於人者先

生獨居其易若夫青雲路阻黃堂位偏先生又蓋處其難胡然而人胡然而天吾不謂然吾祇信流芳襲慶大發於階桂庭蘭先生之精神命脈與造物而同綿勒茲元室偕配永安

廣平府志
參舊縣志

河南道御史陳廷謨墓在縣南十五里

廣平府志
參舊縣志

河南布政司右參議侯君擢墓在縣南二里

同上

清進士戶部員外郎樊正域墓在縣城北一里

探訪
冊

孝子陶盤墓在縣西北十二里

廣平府志
參舊縣志

例授文林郎揀選知縣劉其倫墓在城南半里

歲進士邑人黃金策銘
曰斥邱人傑星應少微

生有自來死曰全歸蜚聲藝苑馳譽桂林朱霞白鶴美玉精金不惠不夷有學有守睚眦一生持
循孝友出其南門鬱鬱佳城流芳百世聞風意傾

清誥封榮祿大夫王慶潮墓在縣西北姚堡村距城八里

採訪冊
清內

閣侍讀學士高賡恩銘曰漳河之隈清皇之臺雲木眷秀蔚為奇材斯文木鐸夔序宏開八踐講
席桃李親栽載誕豪俊庭列三槐汴都多繡光曠上台踵仕齊晉鳧鳥襄徊乾端坤倪大化胚胎
慨泝懿德歲轉星回蓉城斯啓佳氣崔嵬七十而慕悲墳老萊秋生蘭桂泣灑瓊瑰四方觀仰千
載榮哀敬銘貞石用告雲來

烈婦劉氏墓在縣南二里

明蔡可賢銘曰謂山蓋高而下卻汝之節謂水蓋清而
謝卻汝之潔汝骨柔而志堅如鐵身沒而名揭如月汝

惟重此綱常是以輕此生滅胡彼丈夫或有悖德視汝婦人宜瞻喪而心裂我為勒辭表諸墓碣
庶幾後人永為軌則

附 義冢一在東關外地二畝六分零一在南關外地五分五釐

零又高家莊鄭家莊高陵阜蔡家莊四處共地二畝一分零